

**FN-ip inuit innarluutillit pisinnaatitaaffii pillugit aalajangersagaanut Nunatta malitsitsinissaa qulakkeerniarlugu nuna tamakkerlugu iliuusissatut periusissiamik kingusinnerpaamik UPA 2020-mi saqqummiunneqartussamik Naalakkersuisut suliaqarnissaat pillugu Inatsisartut aalajangiiffigisassatut siunnersuut.**  
*(Inatsisartuni Inuit Ataqtigiit ilaasortaataanniit saqqummiunneqartoq)*

## **Ilaqutariinnermut Peqqissutsimullu Ataatsimiititaliap**

**siunnersuutip aappassaaneerpeqarneranut**

### **ISUMALIUTISSIISUTAA**

Ataatsimiititaliap suliarinninnermini makku ilaasortarai:

Inatsisartunut ilaasortaq Laura Táunâjik, Siumut, siulittaasoq

Inatsisartunut ilaasortaq Stine Egede, Inuit Ataqtigiit, siulittaasup tullia

Inatsisartunut ilaasortaq Karl-Kristian Kruse, Siumut

Inatsisartunut ilaasortaq Nivi Olsen, Demokraatit

Inatsisartunut ilaasortaq Malene Vahl Rasmussen, Demokraatit

Inatsisartunut ilaasortaq Mikivsuk Thomassen, Inuit Ataqtigiit

Inatsisartunut ilaasortaq Aqqa Samuelson, Inuit Ataqtigiit

UPA 2019-imi ulloq 25. april 2019-imi siullermeerinninnerup kingorna ataatsimiititaliap siunnersuut sukumiisumik misissorpaa.

#### **1. Siunnersuutip imarisaa siunertaalu**

Naalagaaffiit Peqatigiit Innarluutillit Pillugit Isumaqatigiissutaat ulloq 24. august 2009-mi nangaanertaqanngitsumik atortuulersinneqartup Kalaallit Nunaanni eqqortinneqarnissaa qulakkeerniarlugu nuna tamakkerlugu iliuusissatut pilersaarusiortoqarnissaa siunnersuummi siunertarineqarpoq.

#### **2. Siunnersuutip Inatsisartunit siullermeerneqarnera**

Partiit amerlanersaasa siunnersuut tapersorsorpaat. UPA 2020-imut iliuusissatut pilersaarummut taarsiullugu Naalakkersuisut allannguutissatut siunnersuummik saqqummiussaqaarniarnerat 2023-imilu nalunaarusiorniarnarat partiimit ataatsimit paasineqarluni oqaatigineqarpoq.

Naalakkersuisut akissuteqaataanni allannguutissatut siunnersuutaannut ima oqaasertaqarpoq:

*Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaanni Kalaallit Nunaat eqquutsinersoq pillugu nassuiaammik kingusinnerpaamik UPA2023-mi Naalakkersuisut saqqummiussinissamik peqquneqarnissaat pillugu Inatsisartut aalajangiinissaannut siunnersuut. Eqquutsinissamut atatillugu siuariaatsit amigaatillu pillugit nassuiaat qulaajaassaaq.*

### **3. Ataatsimiititaliap siunnersuummik suliarinninnera**

Ataatsimiititaliap siunnersuut misissorpaa. Tamatumunnga atatillugu Inuit Innarluutillit Illersuisuat aammalu Kalaallit Nunaanni Innarluutillit Kattuffiat attavigineqarput (Nunatsinni Inuit Innarluutillit Kattuffiat – NIIK).

Ataatsimiititaliap makku maluginiarpai:

- Siunnersuutip siullermeerneqarnermini tunngaviumik amerlanerussuteqarfiusoq.
- Naalagaaffiit Peqatigiit Innarluutillit Pillugit Isumaqatigiissutaannut ukiut qulit matuma siorna Kalaallit Nunaata ilaalerera.
- Pineqartoq imaannaangitsoq aammalu nalinginnaasunut teknologimullu tunngatillugu ineriartorfiusoq.
- Kalaallit Nunaanni isumaqatigiisummik malinninnissamut pitsaanerulersitsinissaminullu aamma pitsanngorsaansamut pineqartup ataani inissisimasorpasuit kaammattuutunik annertuumik suliaqartoqareersimasoq.
- Kalaallit Nunaata isumaqatigiisummik malinninnissamut aningaasatigut allaffissornikkullu kingunerisassat pillugit nalunaarusiami taaneqareersimasoq Naalakkersuisut akissuteqaatiminni namminneq tikkuarsimagaat.
- Kalaallit Nunaat 2020-imi ukiakkut Naalagaaffiit Peqatigiit inunmut innarluutilinnut komiteani misilitsissaaq, pisussaq sioqqullugu suliat ilanngunneqartussat suliaralugit aallartinneqareersimassut.

Tamanna tunngavigalugu ataatsimiititaliaq isumaqarpoq:

- Kalaallit Nunaata ukiuni qulini pisussaaffeqarnera eqqarsaatigalugu iliiusissatut pilersaarummik siusinneruskulli suliaqarsimannginnera tunngaviumik ernumanarpoq.
- Soqutigisaqatigiinnut attaveqarnermi taamatuttaarlu Naalakkersuisut akissuteqaataat ersarissumik assigiimmik ilimanarsititsippat suliniuterpasuit aallartinneqareersimasunut ataatsimoortinniarnini nalinginnaasumik suliassat annersarigaat.
- Siunnersuutip aningaasatigut allaffissornikkullu kingunerisassai aallarniutigalugu isummerfigineqareersimani pitsaasuvoq.



- Nalunaarusiamik 2023-imi saqqummiussinissamut taarsiullugu iliuusissatut pilersaarut UPA 2020-imumut saqqummiunneqarnissaanut Naalakkersuisut allannguutissatut siunnersuutaat imarisamigut tunngavilersorneqarsimanngitsoq.
- 2020-imi ukiakkut Naalagaaffiit Peqatigiit inunnut innarluutilinnut komiteani misilitsinnissaq iliuusissatut pilersaarummut missingiusiap pitsaassusaanut qulakkeerinninnissamut periarfissiisoq.

#### **4. Siunnersuutip aningaasatigut kingunerisassai**

Suliassap ataqatigiissaarneqarnissaanut pisariaqartitsineq annertoq tunngavigalugu siunnersuummi nukinnik atuinissamut taaneqartunit annikinnerugaluartoq annertunerusumik allanngortinneqarnissaa pisariaqanngitsoq ataatsimiititaliaq isumaqarpoq. Naalakkersuisut allatut nalunaaruteqanngimmata, 2020-ilu pineqartumut misilitsinnissamut atatillugu pilersaarusiortoqareemat, annertunerusumik sulineq sinaakkusiussat iluini siunnersuummi taaneqartutut naatsorsuutigineqarpoq AC- ukiumut akissarsiaasa tassa 500.000 kr.-t nalingi atorneqassasoq.

#### **5. Ataatsimiititaliap inassuteqaatai**

Pissutsit piviusut pisusaaffiillu aammalu Innarluutillit Pillugit Isumaqatigiissummik Naalakkersuisut suliamik ingerlatsineranni pitsaaqutit ajoqutaasinnaasullu aamma pisariaqartitsinerit, tamatumunnga ilanngullugu ataatsimiititaliami naalakkersuinikkut nalilersuineq tunngavigalugu allannguutissatut siunnersuummik ataatsimiititaliamit pisariaqartitsisoqarnerisooq tamatumunnga ilanngullugu siunnersuutaqqaartoq Naalakkersuisullu allannguutissatut siunnersuutaata assigiinngissusaat ataatsimiititaliamit misissorneqarpoq.

Inerniliissutitut ima ataatsimiititaliaq isummerpoq:

Siunnersuutaqqaartoq aamma Naalakkersuisut allannguutissatut siunnersuutitut saqqummiussaata isumaqatigiissutigineqarsinnaanngitsoq inernilerneqarsinnaavoq.

Tamatuma kingunerisaanik ataatsimiititaliami amerlanerussuteqartut Siumumeersut Demokratineersullu allannguutissatut siunnersuummik imaattumik saqqummiussaapput:

**Naalagaaffiit Peqatigiit Inuit Innarluutillit Pillugit Isumaqatigiissutaat Kalaallit Nunaannit eqquutsinneqarnissaa pillugu nalunaarusiamik kingusinnerpaamik UKA 2021-imi saqqummiusseqqullugit Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.**

**Siumukartoqarnerisooq eqquutsitsisoqartarsimannginnersorluunniit nalunaarusiami qulaajarneqassaaq, nassuiaallu aallaavigalugu kingusinnerpaamik UPA2022-imi nuna tamakkerlugu iliuusissatut pilersaarut, Naalagaaffiit Peqatigiit Inuit Innarluutillit**

**Pillugit Isumaqatigiissutaat malinneqarnissaanut qulakkeerinnittussaq Inatsisartunut Naalakkersuisut saqqummiutissavaat.**

Allannguutissatut siunnersuuteqarnikkut siusinnersumut sanilliullugu Naalagaaffiit Peqatigiit Innarluutillit pillugit isumaqatigiissutaata malinneqarnissaata qulakkeerneqarnissaanut nuna tamakkerlugu iliuusissatut pilersaarummik Naalakkersuisut saqqummiussinissaannik amerlanerussuteqartut kissaatigaat, tamannalu ilisimaleriikkat tunngavigalugit ingerlanneqassasoq.

**Amerlanerussuteqartut Siumumeersut Demokraatineersullu allannguutissatut siunnersuut saqqummiunneqartoq akuerineqassasoq siunnersuutillu allat itigartinneqassasut inassutigaat.**

Inuit Ataqtigiinniit imaatumik immikkut oqaaseqaateqassaagut:

Naalagaaffiit Peqatigiit Innarluutillit pillugit Isumaqatigiissutaannut tunngatillugu pingaarnersiuinermi Kalaallit Nunaat pisussaaffeqarnera eqqarsaatigalugu, Naalagaaffiit Peqatigiit Innarluutillit pillugit Isumaqatigiissutaata malinneqarnissaata qulakkeerneqarnissaanut nuna tamakkerlugu iliuusissatut pilersaarummik pingaarnersiuinissaq nukinginnarsisoq ikinnerussuteqartut Inuit Ataqtigiit isumaqarput.

Inuit Ataqtigiit aaliangiusimavarput siunnersuut nr. 2019/ 48:

**FN-ip inuit innarluutillit pisinnaatitaaffii pillugit aalajangersagaanut Nunatta malitsitsinissaa qulakkeerniarlugu nuna tamakkerlugu iliuusissatut periusissiamik kingusinnerpaamik UPA 2020-mi saqqummiunneqartussamik Naalakkersuisut suliaqarnissaat pillugu Inatsisartut aalajangiiffgisasasattut siunnersuut.**

Taama isikkoqarluni akuersissutigineqassasoq.

Tamatunnga pissutigaarput susasaqartut ukiuni arlaqalersuni kaammatuillutillu noqqaanerat tusaagatsigu.

Maannalu siunnersuutip matuma suliarineqarnerani susasaqartut, ilaatigut Mio, Tilioq kiisalu Nunatsinni Inuit Innarluutillit Kattuffiata oqaloqatiginerini piaartumik piviusunngortitsinissaq kissaatigimmassuk.

Kingumut isigisuunngitsumik, siunissamullu isigisumik pilersaarusiortoqarnissaannik oqariartuuteqarmata.

**Tamatuma kingunerisaanik siunnersuutaqaartup akuerineqarnissaa siunnersuutillu allat itigartinneqarnissaat ikinnerussuteqartut Inuit Ataqatigiit inassutigaat.**

Taama oqaaseqarluni isumaliutissiissumilu allassimasunut paasinnilluni ataatsimiititaliap siunnersuut aappassaaniigassanngortippaa.



Laura Táunâjik  
Siulittaasoq



Stine Egede  
Siulittaasup tullia



Karl-Kristian Kruse



Nivi Olsen



Malene Vahl Rasmussen



Mikivusuk Thomassen



Aqqa Samuelsen